

Date – 20/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Agriculture Minister Pu PC Vanlalruatan Mizoram Sorkarin Feb ni 20-ah Sawhthing lei a kalpui tan dawn tawh avangin Sawhthing chingtute lo inbuatsaih se a ti.**
- 2. MNF Party chuan Free Movement Regime (FMR) thiah an duhloh thu sawiin a tawp thenga dodal zel an tum tih an sawi.**
- 3. US President atana thlan Donald Trump chu zanin hian US President 47-na ni turin lakluh a ni dawn**
- 4. Uttarakhand State Cabinet chuan Uniform Civil Code (UCC) hman tura rawtna a pawm.**

<><><>

AGRI MINISTER

Agriculture Minister Pu PC Vanlalruatan Mizoram Sorkarin Feb ni 20-ah Sawhthing lei a kalpui tan dawn tawh avangin Sawhthing chingtute lo inbuatsaih se a ti.

Vawiina Aizawla ZPM Gen Hq Office a thu a sawinaah Pu PC Vanlalruata chuan, VC inthlan hma ngeia sawhthing lei tumin ruahmanna an siam a, amaherawhchu Sorkarin VC inthlan hun a puan hma tak avangin VC inthlan hma chuan an lei hman dawn lo a, an hun ruat February 20-ah erawh sawhthing an lei tan ngei dawn a, Sawhthing chingtute pawh lo inbuatsaih se a ti.

Minister chuan Sorkar an neih tawhteah kuthnathawktute an beidawng thin a, Kalphung thar mipui Sorkar hnuaiah erawh thlai thar lei hi a takin an kalpui tawh dawn a ti a, nikum lamah cheng vaibelchhe 110 an nei tawh a, kumin Budget-ah vaibelchhe 200 an dah leh a, chuvangin Sorkar thar chuan inthlan laia an lo au hla ang ngeiin an policy an tihlawhtling dawn a, Zoram mipuite pawhin hei hi hriatpui se an duh a ti.

<><><>

FOREST APPEAL

Forest Department chuan mihring chenna hnaia ramsa tla te chu tihnat leh thah phal anilo an ti a, a tilui chu hremna na tak pek theih an nih thu an sawi.

Deputy Conservator of Forests, Aizawl Wildlife Division Pi Margaret Lalramchhani sawi danin tunlaia ramsa hrang hrang tualchhunga hmuh thin chu Scheduled animals an ni a, Wildlife (Protection) Act, 1972 in humhalhna tha tak a pek vek an nih avangin tihnat chuan hremna na tak pek theih a ni a, ramsate chuan mihring huang dai lovin mihring zawk an pun chhoh zel avangin ramsate awmna huang dai zawk an nih thu a sawi.

Ramsate chu ti na mai lova, a hmu hmasa ten Departmen rang taka hriattir turin a chah a, Ramsa ten thlai, bungrua tichhiat an neih emaw mihring tih nat palh an neih chuan a rang thei ang bera Forest Office hnai berah report tur a ni tih sawiin an thil tih chhiat emaw mi an tih nat avanga pawisa sen zatte chu sawrkarin zangnadawmna a pe thei tih a sawi bawk.

Thuchhuah tarlan danin Nikum April 2024-a Aizawl Sahuan atanga Savawm chhuak chu a bul hnai khua, veng mipui ten tih nat tum loin a awm angin ramhnuai lamah an awm tir bakah an huanah a lo luh palh pawhin tina mai loin Department te an hrilh hriat zarah dam takin Aizawl Sahuan-ah man a nih leh theih phah a, Aizawl Sahuan hnaia veng leh khuate chungah Forest Department chuan lawmthu an sawi a ni.

<><><>

PROTECTED AREA REGIME

MNF Party chuan Free Movement Regime (FMR) thiah an duhloh thu sawiin a tawp thenga dodal zel an tum tih an sawi.

MNF Treasurer Pu Lalruatkima chuan kum 1947 - ah India leh Burma ten zalenna an neih hnuah Mizo tam zawkte Burma ram leh India rama thendarha an awm takah India Passport Act chuan Mizoram leh a bik takin Burma ramri a zalen taka inkalh pawh theihna turin, km 16 chhung zalen taka in kalpawh theih turin ruahmanna a siam a, nikum theng khan zalen takin kan inkalpawh a ni a ti a. Zohnahthlakte thendarhin awm mah se, ram in ri nei mahse hnam in ri a nei ve loh avangin zalen taka inkalpawh an ngaih pawimawh thu sawiin chhiatni thatni leh kawng tinrengah an unau Burma lama awmte nen intanpui tawna an in chhawk thin laia Sorkar laipuiin Free Movement Regime (FMR) hlih a tum ta mai chu lungchhiatthlak an tiin tun hnaia Zokhawthar lei khar a ni ta mai chu pawh an tih thu an sawi bawk.

Sorkar laipui chuan zalen taka inkalpawhna tihtawp a nih theih nan nikum December atang khan Free Movement Regime (FMR) hlipin ramri a inkalpawhna a dang tan a, Mizoram Legislative Assembly nikum February

thlaa neih chuan special resolution siamin Free Movement Regime (FMR) duhlohna leh Border Fencing duhlohna a siam a ni.

<><><>

BJP MIZORAM

BJP Mizoram State member ten vawiin khan "SAMVIDHAN GAURAV ABHIYAAN" Constitution chungchang an zirho a,

He hun Aizawl-a an party office a neih hi State Vice President Pu JB Rualchhingain a kaihhruai a, State Vice President Pu Vanupa Zathang chuan thusawiin, India ramah eng party pawh sawrkar sela, Indian Constitution hi India ram Parliament ah pawh, an duh ang anga siam danglam theih a ni lova, Rorellai party-te chuan an thu pass duhte chu, Party mal anga an tam avang ringawt pawhin siam dang lam mai mai theih ani lo a ti a, he Constitution thuhmahruai 'Preamble' hi paih theih a ni lova, Preamble-a ziak ho Rorelna dik, Zalenna, intluktlanna, in unauna tih chu hnualsuatin an tidanglam thei lova, hemi pel hian dan siam theih a nilo a ni," a ti bawk.

Samvidhan Gaurav Abhiyaan Convener Pu JB Rualchhinga chuan Article 370 nuaibo a nih hnuah dan intluktlanna Jammu & Kashmir ah hman a nih tak avangin Architect of the Indian Constitution Pu Ambekar duhthusam a nih ngei a rinawm a ti a. CAA chuan hnam hnuaihning zawk dalit leh tribal te dinhmun a siam that avangin, hei hi a duh dan a ni bawk a ti a. Congress hian Article 356 chu a ti khawloh avangin India ramah Emergency puan a lo ngaih phah tawh a ni. OBC, ST/SC te tana dan siam that leh reservation siamte hi Pu Ambedkar hmathlira hman chhoh mek zel a ni. BJP chuan zaa 33 hmeichhiate tana a hauh sah pawh Pu Ambedkar-a'n India ram chu politics ah a kal that nan leh chanvo tha mi tinin an neih theih nan tia a hmathlir a ni, a ti.

Inkhawm ah hian Constitution chungchang a zawhna leh chhanna te neih niin, sawi hona neih ani bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

MPCC

Vawiin khan Congress Party Local Council member zawng zawngte chu MPCC President Lal Thanzara hovin Lal Thanhawla Auditorium, Congress Bhavan ah inhmukhawm a.

MPCC President Lal Thanzara chuan thusawiin, Pathian in kohhran leh politics chu a rawngbawl nan, ram siamthat nana a pek a ni a. Village Council tha, Local Council tha a awm loh chuan ram tha a neih theih tak tak loh a, an pawimawhna hi a sang em em a ni a ti. Mizoram siamtha tur chuan politics leh kohhran tanrual a ngai tih sawiin, Village level ah Local Council level ah chhungkaw tha din phawt a ngai a ti bawk.

Pu Lal Thanzara chuan Mizoram chu chhantlak a la awm a, mahse, ZPM sorkarin an term an hman zawh chuan a chhe viau ang ti a. Sum leh pai an pûk

a ngaih nasat chhan chu Central-a a chahbi kawltute ZPM sorkar chungah an lawm viau lo a ni thei a, chuti ni lo se chuan pawisa an pûk ngai lo hian an rawn enkawl theih a ring a ti.

ZPM tana lâi em em chu BJP zawmpui pangngai awm anga an inlan rual rualin Mizo kohhran miten an thinhrik ang tih an hlau bawk si chu a ni a ti a, he sorkar hi a thutiamah a ding dawn em, ding thei dihnmunah pawh a ding dawn em tih chu ngaihtuah tham tak a ni tih hi a la hre lo te inhrilh var a ngai a ni, a ti bawk.

MPCC President chuan ZPM sorkar chu thingtlang kutthnathawktute beiseina tihlawhtlingin sawhthing leisak thei hram se tih chu Congress party duhdan a ni, a ti.

<><><>

SAITUAL

Saitual Bawrsap Dr. Lalgura Tlau chuan North Eastern Region Agri-Commodity e-Connect NERACE leh MOVCD-NER hnuai Sialkal FPC leh Mawmrang FPC State Co-Ordinator leh CEO te chu vawiin khan a Office Chamber-ah a kawm a.

He hunah hian FPC hotute chuan an hmalakna hrang hrangte an thlen a, farmer te tana hlawk leh man man zawka sawhthing hralh theihna tura hma an lakpui theih thute, sawngbawl zui thlenga an khawih theih thute bawrsap hi an hrilh a ni.

Sialkal FPC leh Mawmrang FPC Co-Ordinator leh CEO te hian thlai thar lakte sawngbawl na atana tui dah khawl na leh tih changtlnna chungchante Bawrsap chu an sawipui a, Machinery an neih tawh dante, sawhthing sawngbawlnate pawh an neih thu leh engemawzat an hralh chhuah tawh thute chu Bawrsap an hrilh a ni.

Mawmrang FPC te hian nikum December thla khan Trifac Agro Company Ltd hnenah hmarcha Metric Ton 2 chu kg ah 500 in thlai ching tute chu an lo hralhsak tawh a ni.

<><><>

US PRESIDENT

US President atana thlan Donald Trump chu zanin hian US President 47-na ni turin lakluh a ni dawn. Washington,DC-a Capitol Rotunda-ah Chief Justice Justice Roberts chuan rinawmna thu tiam tirin a la lut dawn a. Nizan khan President Trump-a hian Washington DC-a vantlang inkhawmah thusawiin US –in harsatna chi hrang hrang a tawh mek atanga khai chhuak turin chak takin hma a la dawn a ni a ti. President Trump-a rual hian Vice President JD Vance pawh lakluh a ni dawn a ni.

US President lakluh inkhawmah hian India aiawhin External Affairs Minister S.Jaishankar-a tel dawn a. Khawvel ram hrang hrang atangin hruaitute an kalkhawm bawk ang.

<><><>

UTTARKHAND UCC

Uttarakhand State Cabinet chuan Uniform Civil Code (UCC) hman tura rawtna a pawm a. State chungah UCC ataka kalpui turin a inbuatsaih chho mek a. Uttarakhand Cabinet thutlukna hian state dangte tana entawn tur a

kawhhmuh dawn a. State sawrkar ten chak zawka inrelbawlna tha leh vantlang nun siamthatna an tumna kawngah a pawimawh dawn hle a ni.

Uttarakhand Chief Minister Pushkar Singh Dhami chuan chanchinbumite kawmin UCC chuan nghawng tha tak a neih a beisei thu a sawi a. Uttarakhand-in UCC an hman chuan ramchhung state dangte pawhin an entawn chho ve zel dawn a ni a ti.

<><><>

RG KAR

Kolkata Sealda Court chuan RG Kar pawngsual leh inthahnaa mawhphurtua puh Sanjoy Roy chu damchhung lung in tang turin a hrem. Sessions Judge Anirban Das chuan vanduinna tuartu chungte hnenah cheng nuai 17 pe turin sawrkar a hriattir bawh a. Kar hmasa khan Sanjoy Roy hi Court chuan thiamloh a chanter tawh a. Nikum August ni 9 khan RG Kar Medical College-a PGT doctor pakhat chu pawngsuala thah a ni a. A tuk August ni 10 ah Sanjoy Roy hi Kolkatta Police ten an man a ni. Hemi hnu hian CBI kuta hlan a zui a ni.

<><><>